

## وفات ناپليون

بو اثناده ناپليون بو ناپارته نك وفاتي خبري اوروپا غزته لرنده كورلمش و انك وفاتيله اوروپا حكمداراني بر بيوك انديشه دن قورتمشدر.

شاني زاده دير كه كچن ماه ذي القعدة سلخنده فرانسه و جزائر بحر رومك منسوب اولدقلى و الان برج قران انتقالى تعبير اولنان سنبله ده واقع كسوفك اثر معظم تأثيريله بر مدتنبرو سنت Helen الن Saint جزيره سنده مقيم اولان سابقاً فرانسه ايمپراطورى ناپليون بوناپارته بر شديد وجع معده ايله خسته لنوب موتى تيقن ايتدكده وصيت ايدوب ديمشكه بابام اللى ايكي ياشنده ايكن بونك عيني بروجع ايله فوت اولمش ايدى. غالباً بنده بو علتدن فوت اوله جغم بعدالموت جسديمي اطبا تشريح ايدوب بنده نه مقوله مرض بولورلر ايسه اولبايده بر رساله ترتيب ايدوب حالاً نمچه ايمپراطورى قيزندن تولد ايدوب والده سيله اول محلده اولان اوغلمه ورسونلر زيرا بو علت بكا پدرمدن موروث اولديغنه نظراً بدن دخي اوغلمه ميراث قاله جقدر. و بنم بو اطه ده اقامتمنبرو و مقدمجه فرانسه نك منافع و نظامات و اوروپا دوليله قوللانديغم معاملات و انلرله واقع اولان محارباته دائر يازديغم سرگزشت كرچه تكميل اولوب انجق سائر سبقت ايدن خصوصاته دائر تاريخمى يازمق ايچون فلان كيمسه حكمت آشنا و احوال عالمى دانا اولمغله بنم ايراد مخصوصمدن اكا سنوى شو قدر بيك ريال تخصيص ايلدم بهر سنه اله رق الى آخر العمر احوال و افعالمى اولديغى كى يازسون قالديكه زوجه م و اوغلم ايمپراطور زاده اولدقلىندن انلره وصيت لازم كلميوب انجق اوغلمك تعليم و تربيه سنى بيوك پدرى و امپراطور مشار اليهك عهده سنه احواله ايدرم ديوب چوق كچميه رك فوت اولديغى و وصيتى موجبنجه تشريح اولنوب معده سنده سرطان تعبير اولنور چبان بولديغى بو اثناده ورود ايدن اوروپا حوادث نامه لرندن مستبان اولمشدر. انتهى.